



MINISTÉRIO DA
JUSTIÇA

DIRECÇÃO NACIONAL DE
ASSESSORIA JURÍDICA
E LEGISLAÇÃO

Dekretu-Lei n.º 10/2020

25 Marsu

REJIME FOUN BA ATIVIDADE FORMASAUN IHA SENTRU FORMASAUN JURÍDIKA NO JUDISIÁRIA

Hanesan komponente importante atu sistema Justisa nian bele la'ó ho di'ak, no haree liután, ba Estadu Direitu ida nian, prezisa tebes duni iha dezempeñu ne'ebé ho kualidade hosi Majistradu Judisiál, Majistradu Ministériu Públiku nian no Defensór Públiku sira, nuudar profisionál ho kompeténsia, tenke tuir kuadru formasaun ne'ebé rigór no ezijente atu nune'e, bele hakbiit di'ak liután kandidatu sira bainhira ezerse funsaun importante hirak-n'ee. Iha Timor-Leste, to'ó ohin-loron, Sentru Formasaun Jurídika no Judisiária (SFJJ) Ministériu Justisa nian, maka fó formasaun dahuluk ba majistratura no defensoria pública ne'ebé foin hahú knaar. Ne'ebé regula iha Dekretu-Lei n.º 15/2004, 1 setembru, diploma espesial ne'ebé la revoga hosi Dekretu-Lei 18/2016, 22 juñu, hodi aprova rejime ba atividade formasaun ne'ebé hala'ó iha SFJJ.

Maibé, rejime ida-ne'e hamosu deskonformidade ho diploma sira seluk, liuliu, diploma ba estatutu hosi kareira profisionál hirak seluk hosi setór Justisa nian.

Nune'e, SFJJ iha nafatin vigór kona-ba rejime recrutamentu, ingresu no fó formasaun ba kandidatu profisionál sira-ne'ebé iha regulamentu rasik no espesífika. Maibé iha kazu barak ne'ebé la kona-di'ak ho rejime SFJJ nian.

Hanesan akontese ho Advogadu Privadu sira, profisaun ne'ebé regula iha Rejime Jurídiku Advokasia Privada no Formasaun ba Advogadu sira (Lei n.º 11/2008, 30 de jullu, ho alterasaun ba Lei n.º 4/2015, 30 dezembru); nune'e mós ba Konservatóriu no Notáriu sira, ne'ebé regula iha Dekretu-Lei n.º 2/2012, 15 fevereiru (Estatutu Konservatóriu no Notáriu, EKN), nune'e mós, ba Dekretu-Lei n.º 3/2012, 15 fevereiru kona-ba (Regulamentu ba Formasaun hodi Ingresu iha

Kareira Konservador no Natáriu); ba Funsionáriu Judisiál sira, ne'ebé regula iha Estatutu Ofisiál Justisa nian (Dekretu-Lei n.º 19/2012, 25 abril); Guarda Prizionál no Tékniku ba Reinsersaun Sosiál, nomós, ba modelu rekrutamentu, ingresu no prova ba selesaun ne'e rasik tuir Estatutu Guarda Prizionál, ne'ebé aprova hosi Dekretu-Lei n.º 10/2012, 29 fevereiru; no, akontese mós ho formasaun ba "Funsionáriu PSIK", ne'ebé iha diploma rasik, Dekretu-Lei n.º 15/2014, 14 maiu (Orgánika ba Polísia Sientífika no Investigasaun Kriminál).

Ho ida-ne'e, importante tebtebes atu haree hikas fali rejime SFJJ nian, hodi nune'e, bele hasai tiha norma hotu-hotu ne'ebé hamosu konfliktu ho rejime sira seluk.

Bainhira atualiza no armoniza lejislativa ne'e, tenke haree no aproveita liután hodi introdús solusaun foun ba rijime ne'e duni. Hanesan hadi'ak prosedimentu no prátika hosi esperiéncia kursu formasaun inisiál hirak be tatuir, ne'ebé sei iha falta ka buka hodi bele hadi'ak liután.

Molok hatuur iha lei prezisa haree abandonu hosi obrigasaun abertura ba kursu foun sira iha kada tinan. Atu nune'e, bainhira ministériu foti desizaun hodi halo abertura ba kursu foun tenke bazeia de'it ba momentu ne'ebé oportunu, no, haree katak prezisa duni rekursu umanu foun hodi hatán ba nesesidade ne'e.

Iha sorin seluk fali, no hanesan forma ida hodi tane-aas no la deskrimina kareira profesionál tolu ne'e, adota prinsipiu ida hodi fó kursu ingresaun la hamutuk ba kada kareira ida-idak, ho konteúdu kurikulár ne'ebé adaptadu tuir ezijéncia servisu nian.

Ikus mai, sei fó tempu barak liután ba faze teoria-prátika hosi formasaun nian, tan komprova ba tempu ne'ebé limitadu, atu nune'e, la'ós aprofunda koñesimentu de'it, maibé hala'o servisu profesionál di'ak liután.

Nune'e, desidi hodi haree didi'ak ba alterasaun, atu revoga Dekretu-Lei n.º 15/2004, 1 setembru, nomós, Dekretu-Lei n.º 18/2016, 22 juñu, hodi substitue fali ba diploma foun ne'ebé hatada momoos matéria hotu be importante ba rejime ingresu no formasaun ba kareira Majistradu Judisiál, Ministériu Públiku no Defensór Públiku sira, atunune'e, bele hadi'ak liután atividade formasaun iha SFJJ.

Nune'e,

Governu dekreta tuir termu n.º 3 artigu 115.º atu sai hanesan lei tuirmai:

KAPÍTULU I

Dispozisaun jerál

Artigu 1.º

Objetu

Diploma ida-ne'e estabese rejime kona-ba organizasaun no funcionamentu ba atividade profisionál iha Sentru Formasaun Jurídika no Judisiária, ne'ebé ba oin se temi ho designasaun SFJJ, no rejime ne'e mós aplika ba formandu, dosente, formadór nomós ajente sira seluk hosi formasaun nian.

Artigu 2.º

Atribuisaun

1. SFJJ iha kompeténsia hodi aseguira formasaun inisiál no kontínua ba kareira profisionál hosi Majistradu Judisiál, Majistradu hosi Ministáriu Públiku nian, no Defensór Públiku sira.

2. Iha esesaun no to'ó Orden Advogadu sira iha instalasaun, SFJJ iha nafatin kompeténsia hotu tuir Rejime Jurídiku ba Advokasia Privada no Formasaun ba Advogadu sira, ne'ebé aprova iha Lei n.º 11/2008, 30 jullu, ho alterasaun ne'ebé introdús hosi Lei n.º 1/2013, 13 fevereiru, no Lei n.º 4/2015, 30 dezembru.

3. Atu buat hotu ne'ebé temi ona iha n.º 1 bele iha efeitu SFJJ tenke:

- a) Estabese sistema ba ensinu Direitu no formasaun jurídika hodi bele prodús rekursu umanu ne'ebé setór Justisa prezisa;
- b) Asegura atividade formasaun ne'ebé kualidade, liuhosi planeamentu, monitorizasaun no avaliasaun;
- c) Adota polítika ba ensinu no aprendizajen iha lian rua, hodi aseguira ensinu no produsaun ba meteriál apoiu no konteúdu bibliográfiku iha lian-ofisiál rua;
- d) Fó apoiu ba kandidatu iha kursu formasaun nian, liuliu, ba kursu sira-ne'ebé refere iha noº 4 hosi artigu 3.º.

4. Iha ámbitu formasaun kontínua no komplementár nia laran, SFJJ bele realiza mós kursu aprefeisoamentu ka asaun formasaun iha tempu badak no média, ne'ebé destina ba:

- a) Advogadu no Advogadu estajiáriu sira;
- b) Konservadór no Notáriu sira;
- c) Ofisiál Justisa sira;
- d) Tradutór no Intérprete sira iha área jurídika ne'ebé hola-parte iha Ministériu Justisa no instituisaun judisál seluk;
- e) Guarda Prizionál no Técnica Reinsersaun Sosiál sira;
- f) Kareira ba Korpu Espesiál Polísi Sientífika Investigasaun Kriminál nian;
- g) Funsináriu públiku sira seluk iha área direitu no Justisa nian.

5. Bainhira seidauk iha regulamentasaun espisífika ba ida-ne'e, SFJJ bele organiza no asegura formasaun mediador, hanesan forma ida hodi sertifika habilidade ba funsaun ida-idak nian.

KAPÍTULU II

Atividade ba formasaun

Artigu 3.º

Formasaun

1. SFJJ organiza kursu formasaun inisiál no kursu formasaun kontínua.
2. Iha ámbitu kursu ne'ebé temi ona iha número liubá, bainhira de'it iha justifikasaun, SFJJ bele organiza kursu formasaun komplementár.
3. SFJJ, iha ámbitu ba atividade formasaun nian, direta ka la direta, bele promove no desenvolve kona-ba oinsá organiza semináriu, konferénsia no prodús publikasaun sientífika iha área formasaun jurídika no direitu nian.
4. Bele mós organiza kursu hodi aperfeisoa lian-portugés, liuliu, prepara sira-ne'ebé iha interese no admite ba kursu formasaun inisiál hodi tama ba kareira profesionál ne'ebé promove hosi SFJJ.
5. Maske frekuenta no aproveita didi'ak kursu aperfeisoamentu ne'ebé preve ona iha número liubá, sira-ne'ebé iha interese ba konkursu sasá de'it hodi tama ba kareira ne'ebé temi tiha ona, tenke kandidata an nafatin tuir kondisaun ne'ebé hanesan ho konkorente sira seluk.

Artigu 4.º

Planu no relatóriu anuál ba atividade formasaun nian

1. Períudu ba atividade iha SFJJ la'o-tuir nafatin ano-sivíl nian.
2. Atividade ba formasaun iha SFJJ tau-hamutuk iha planu anuál ba atividade, ne'ebé elabora to'o 31 marsu tinan kotuk nian, hodi refere ba atividade ne'e.
3. To'o lora ne'ebé refere ona iha número kotuk ba, SFJJ elabora mós relatóriu kona-ba atividade formasaun hirak ne'ebé la'o ona iha tinan kotuk ba.

4. Hafoin rona tiha Kosellu Pedagójiku no Dixiplinár, Diretór SFJJ iha responsabilidade hodi elabora planu no relatóriu kona-ba atividade formasaun tinan ida nian.
5. Planu anuál ba atividade, sei submete ba Ministru Justisa hodi hetan apresiasaun, no Kosellu Jerál mak sei fó aprovasaun to'o 30 abril iha kada tinan.
6. To'o loron ne'ebé refere iha númeru liubá, Konsellu Jerál sei apresia relatóriu atividade hosi SFJJ.

Artigu 5.º

Planu ba formasaun

1. Sei elabora planu formasaun ida rasik ba kursu formasaun, ne'ebé define objetivu no liña jerál sira kona-ba metodolojia no programa ba atividade formasaun, no temi mós kona-ba distribuisaun materiál hosi unidade levita nian.
2. Planu ba formasaun tenke iha konteúdu kurikulum ne'ebé adapta ba funsaun espesífika hosi kada kareira profisionál nian.
3. Ba hirak ne'ebé temi ona iha n.º 4 hosi artigu 11.º, planu ba formasaun bele preve, liuliu, iha matéria oioin, kona-ba módulu komun no módulu espesífiku ne'ebé iha ligasaun ho klase profisionál ne'e duni.
4. Módulu sira bele ho frekuénsia obrigatória ka opsonál.
5. Konsellu Pedagójiku no Dixiplinár maka elabora planu ba formasaun, no bainhira de'it Diretór aprova ona, sei integra iha SFJJ nia planu anuál ba atividade nian.

artigu 6.º

Metodolojia ba ensinu no aprendizajen

1. Atividade formasaun SFJJ nian, tau importánsia liu, ba métodu pedagójiku ne'ebé orienta ba akizisaun no aprofunda koñesimentu teoria-prátika ne'ebé adekuaudu no efikás duni iha formasaun profisionál ba adultu sira, atu nune'e formandu sira bele partisipa ativa liután, liuliu, iha estudu, halo análise ho crítica ba kazu lejislasaun nian, debate nomós halo simulasaun ba situasuan réal no traballu grupu nian.

2. Hosi métudu formasaun ne'ebé refere iha númeru liubá, métudu ida ne'ebé sei haree liuliu mak métudu prezensiál, *b-learning* no *e-learning*.

3. Bainhira de'it mak SFJJ haree katak preziza promove destinatáriu sira-nia partisipasaun iha formasaun ida-idak nian, iha esesaun, hodi organiza atividade ho forma ne'ebé fleksível, hanesan halo atividade hafoin formasaun ka la'ós iha loraon servisu nian.

Artigu 7.º

Natureza ba atividade ho lian-rua iha Sentru Formasaun Jurídika no Judisiária

1. SFJJ desenvolve atividade sira iha lian-ofisiál rua.
2. Tenke hanorin lian-portugués no lian-tétum ba kursu inisiál hotu-hotu iha SFJJ, hanesan dalan ida hodi orienta ba prátika profisionál jurídika no judisiária nian.
3. Lahó prejuízu ba dispostu iha númeru kotuk ba, área formasaun jurídika iha SFJJ tane-aas hodi uza lian-portugués, ho objetivu atu promove domínio no kompreensaun ba konseitu rasik hosi linguajen no sistema jurídika nian.
4. Lahó prejuízu ba dispostu iha númeru kotuk ba, SFJJ garante katak asaun hotu-hotu ba formasaun sei prodús materiál hodi fó-apoiu ba estudu no bibliografia ba materiál jurídika nian iha lian-tétum.

KAPÍTULU III

INGRESU BA KURSU FORMASAUN INISIÁL MAJISTRADU JUDISIÁL, MAJISTRADU HOSI MINISTÉRIU PÚBLIKU NO DEFENSOR PÚBLIKU

SEKSAUN I

Dispozisaun jerál

Artigu 8.º

Aplikasaun subsidiária

Ba buat hotu ne'ebé mak la regula iha lei ida-ne'e, sei aplika rejime Estatutu ba kareira profisionál ida-idak, ho adaptasaun balu, hanesan mós ho Estatutu Funsau Públika nian.

Artigu 9.º

Konkursu ba ingresu

1. Ingresu ba kursu formasaun inisiál Majistradu Judisiál, Majistradu hosi Ministériu Públiku no Defensór Públiku, halo liuhosi konkursu públiku, ho objektivu atu preenxe vaga ba kareira profisionál sira-ne'e.
2. Kandidatu sira-ne'ebé mak hetan aprovasaun no klasifikasaun di'akliu mak tama ba kursu formasaun inisiál hodi preenxe número ba vaga ne'ebé fó-sai iha abertura konkursu nian.

Artigu 10.º

Rekizitu ba kandidatura

1. Rekizitu jerál ba kandidatura ne'ebé atu tama ba kareira Majistradu Judisiál, Majistradu hosi Ministériu Públiku no Defensór Públiku, hanesan:
 - a) Sidadaun timoroan;
 - b) Iha formasaun akadémika área Direitu nian, ho grau lisensiatu ka liu;
 - c) Iha dóminiu ba hakerek no ko'alia lian-ofisiál rua;
 - d) Iha kondisaun jerál ne'ebé di'ak hodi ezerse funsaun públika.
2. Rekizitu ne'ebé preve iha número kotuk ba, tenke verifika ho loron publikasaun iha Jornál Repúblika nian kona-ba avizu ba abertura konkursu.

Artigu 11.º

Abertura ba konkursu

1. Iha kada tinan, bainhira to'o ona loron-ikus fulan fevereiru nian, Konsellu Superiór hosi Majistratura Judisiál, Konsellu Superiór hosi Ministériu Públiku no Konsellu Superiór Defensoria Públika nian, liuhosi eskrita, sei komunika ba Ministru Justisa informasaun ne'ebé iha fundamentu kona-ba Majistradu no defensor hirak mak instituisaun ne'e prezisa, hodi bazeia mós ba durasaun formasaun inisiál nian.
2. Bazeia ba informasaun ne'ebé refere iha número liuba, no, bainhira haree katak profisionál sira-ne'e prezisa duni halo konkursu ingresu ida, Ministériu Justisa liuhosi despaxu, bele autoriza abertura konkursu nian, hatuur-loloos número ba vaga ne'ebé atu prenxe, nune'e mós, espesifika kareira profisionál saida mak hakarak atu loke ba, no haruka publika avizu ne'e.
3. Ministru Justisa nia despaxu tenke privilejia abertura kursu formasaun inisiál ne'ebé keta-ketak ba kada kareira profisionál ida-idak.
4. Lahó prejuizu ba ida be temi iha número liuba, bainhira número hosi kada vaga kareira profisionál nian, tuir termu n.º 1 ho nia konjuntu, menus liu sanulu, bele autoriza hodi loke kedas kursu sira, hodi hetan tan kareira ida ho komponente kurikulár be besik hanesan.

Artigu 12.º

Avizu ba abertura

1. Diretór SFJJ mak iha kompeténsia hodi haruka fó-sai iha Jornál Repúblika kona-ba avizu abertura konkursu nian, ne'ebé refere iha artigu liuba.
2. Avizu ba abertura konkursu, tenke temi elementu hirak tuirmai:
 - a) Identifika despaxu ne'ebé autoriza abertura ba konkursu;
 - b) Rekezitu kona-ba admisaun ba konkursu;
 - c) Númeru ba vaga hirak be atu preenxe, liuliu, hatudu kareira profesionál sira ne'ebé atu preenxe ba;
 - d) Uza métudu oinsá ba selesaun no nia faze sira, ne'ebé hatudu karatér eliminatóriu;
 - e) Prova ba koñesimentu ne'ebé mak atu realiza, nune'e mós, matéria nobibliografia referénsia nian;
 - f) Entidade ida-ne'ebé mak kandidatu atu apresenta rekerimentu ba, enderesu, prazu ba entrega, forma apresentasaun nian, dokumentu sira be atu tau-hamutuk, no, indikasaun hirak seluk be presiza hodi formaliza kandidatura;
 - g) Tenke hatudu katak, bainhira, la apresenta dokumentu komprovativu tuir rekizitu ne'ebé fo-sai iha avizu, ne'e determina kedas hodi la adimite ba konkursu, maibé ne la kona, ba sira-ne'ebé konsidera dispensadu iha tempu balu nia laran;
 - h) Kompoziasaun ba júri;
 - i) Fó-sai forma oinsá atu publika lista ba kandidatu sira ne'ebé adimitidu no la admitidu, rezultadu hodi aplika métudu selesaun no nia faze sira, nune'e mós, lista klasifikasaun ikus nian.

Artigu 13.º

Júri ba konkursu

1. Iha konkursu ingresu ba formasaun kareira Majistradu Judisiál, Majistradu hosi Ministériu Públiku no Defensór Públiku nian, Ministru Justisa maka nomeia membru efetivu na'in-tolu no membru suplente na'in-tolu hosi profesionál ba kareira ne'e rasik, hodi sai júri ba konkursu.
2. Konsellu Superiór Majistratura Judisiál, Majistradu Judisiál hosi Ministériu Públiku no Defensoria Públika, mak iha kompeténsia hodi nomeia membru efetivu no suplente sira, tuir kareira ne'ebé iha ba konkursu ingresu nian;
3. Tenke hatudu presidente iha despaxu ba nomeiasaun júri nian.
4. Tau iha avizu ba abertura konkursu nian, kona-ba kompozisaun júri.
5. Bainhira de'it bele, kompozisaun ba júri, tenke respeita mós ho ekilíbriu jéneru nian.

6. Ministru Justisa mak halo despaxu kona-ba membru juri sira-nia seña prezensa ne'ebé ho montante fiksi.
7. Júri mak iha kompeténsia hodi realiza operasaun sira kona-ba prosedimentu konkursu, liuliu, elabora lista provizória ba kandidatu ne'ebé admitidu no la admitidu, hodi indika motivu sira, hafoin verifica konformidade hosi kandidatu, nune'e mós ho rekezitu ba admisaun konkursu nian.
8. Júri bele iha funsaun bainhira de'it membru hotu-hotu marka prezensa, tan maioria mak foti desizaun.
9. Prezidente-júri mak hili vogál ida hodi sai nuudar sekretáriu ba juri.
10. Júri ezerse knaar rasik be prevalese ba tarefa hotu, nune'e mós ba nia membru sira bainhira laho justifikasaun la kumpre responsabilidade ba prazu ne'ebé preve iha diploma ida-ne'e, ka la halais prosesu rekrutamentu, no selesaun ho forma ida be adekuada.

Artigu 14.º

Aprezentasaun ba kandidatura

1. Kandidatu ba konkursu halo liuhosi rekerimentu ne'ebé diriji ba Diretór SFJJ nian, ne'ebé apresenta iha loron-15 nia laran, sura hosi loron ne'ebé fó-sai avizu ba abertura konkursu be refere iha artigu kotuk ba, no, akompaña mós dokumentu sira-ne'ebé presiza hodi halo instrusaun ba prosesu kandidatura ida-idak nian.
2. Sei la taka-dalan, ba funsionáriu públiku ne'ebé kandidata-an ba konkursu ingresu iha kursu formasaun SFJJ nian, no la haree ba buat sasá de'it, ka hosi nia servisu-fatin, nein depende mós ba autorizasaun sé nian de'it.
3. Haree ba ipóteze be preve iha n.º 4 hosi artigu 11.º, kona-ba rekerimentu ne'ebé diriji ba Diretór SFJJ nian, hodi admite ba konkursu, nune'e mós ba rekizitu sira seluk be preve iha lei, kandidatu tenke hatudu lolos opsau ba kareira ne'ebé hakarak tuir.
4. Opsau ne'ebé manifesta iha termu número liubá, sei konsidera tuir orden gradusaun ne'ebé hetan iha termu artigu 23.º, no, sei haree mós ba vaga lubuk ida be atu prenxe ba tuir kareira ida-idak nian.
5. Kandidatu sira be la hatudu loloos vaga ne'ebé disponível tuir termu hosi número kotuk ba, sei la hola-parte iha kursu.

Artigu 15.º

Lista ba kandidatu ne'ebé admitidu na la admitidu ba konkursu

1. Iha prazu loron-10 nia laran, konta tuir termu hosi prazu ne'ebé hatuur ona hodi apresenta kandidatura, Diretór SFJJ sei aprova lista provizória ba kandidatu sira be admitidu no la admitidu, hodi fó-sai motivu ne'ebé iha. Hafoin haree fikas fali konformidade ba kandidatu tuir rekizitu ba admisaun konkursu nian.
2. Lista ne'ebé temi iha número liubá, sei fiksa iha sede SFJJ nian, no, fó-sai iha internét hodi temi loron ne'ebé atu fó-sai.
3. Bele halo reklamasau ba Diretór SFJJ nian kona-ba lista, iha prazu loron-10 nia laran, sura hosi loron ne'ebé fó-sai.
4. Bele hatoo reklamasau ho prazu másimu loron-15 nia laran, sura hosi apresentasaun ne'e rasik.
5. Bele hatoo reklamasau ka la iha iha reklamasau, hafoin kedas prazu ne'e nia laran hela, Diretór SFJJ ordena hodi publika iha artigu tuirmai.

Artigu 16.º

Forma ba publicidade

1. Sei pública iha SFJJ, Internét no nia sede kona-ba:
 - a) Avizu hodi konvoka kandidatu sira atu bá tuir prova oioin kona-ba koñesimentu, eskrita no orál, no sei temi mós loron, oras no fatin, maibé, bainhira tau iha avizu ba abertura konkursu nian;
 - b) Pauta ba klasifikasaun hosi prova konesimentu, eskrita no orál, nune'e mós ho lista provizória ba kandidatu sira be admitidu no la admitidu iha konkursu.
2. Forma ne'ebé refere iha número liubá, hanesan forma ofisiál únika hodi divulga elementu no rezultadu be temi iha-ne'e.
3. Sei fó-sai iha Jornál Repúbika:
 - a) Avizu ba abertura konkursu nian;
 - b) Lista definitiva ba kandidatu sira ne'ebé liu no la liu iha konkursu, be temi iha n.º 5 hosi artigu 24.º;
 - c) Lista ba klasifikasaun no graduasaun definitiva hosi kandidatu sira be liu ona iha faze finál ba kursu ne'ebé temi iha artigu 39.º.
4. Lahó prejúizu ba preseitu hosi número-1 no 2, bainhira mak SFJJ seidak kria nia pájina internét rasik, publikasaun ne'ebé temi ona iha-ne'e, sei fó-sai iha sede SFJJ nian, nune'e, bele mós fó-sai iha Ministériu Justisa nia fatin.

SEKSAUN II

Métudu no Faze ba seleksaun

Artigu 17.º

Métudu ba seleksaun obrigatóriu

1. Sei halo selesaun ba kandidatu sira tuir rezultadu be sira hetan iha prova ba koñesimentu, no sira tenke halo-parte duni ba faze eskrita no oral nian.
2. La'ós de'it halo prova ba koñesimentu nian, sei iha mós izame psikolójiku hodi halo selesaun.
3. Ba kada faze no métudu hodi halo seleksaun, se aplika parte eliminatóriu.
4. Ida be temi iha n.º 2 sei la taka-dalan ba métudu selesaun seluk, naran katak métudu ne'e preve ona iha Estatutu ba kareira profisionál ida-idak nian.

Artigu 18.º

Prova ba koñesimentu

1. Bele tau de'it ba prova koñesimentu kona-ba matéria sira be tau iha avizu ba abertura konkursu nian, no, tenke hala'o iha faze rua tatuir, ho forma eliminatória, hanesan:
 - a) Faze eskrita;
 - b) Faze oral.
2. Kandidatu mak falta de'it iha prova koñesimentu rua ne'e ida, eskrita no oral, ne'e hasai kedas.

Artigu 19.º

Faze eskrita

1. Iha faze eskrita ba prova koñesimentu nian, sei avalia, liuliu, maka qualidade hosi informasaun ne'ebé kandidatu transmite, nia kapasidade hodi halo análise no sínteze ba konteúdu hosi resposta sira, hatudu nia simplisidade no klareza, domina konseitu jurídiku no nível komprensaun ba lian-portugés nian.
2. Iha faze eskrita ba konkursu sei realiza prova koñesimentu kona-ba matéria sira be fó-sai iha avizu ba abertura konkursu nian mak:
 - a) Prova ida hodi rezolve kazu direitu sivíl, direitu komersiál, ka rua ne'e hotu, no, direitu prosesuál sivíl;
 - b) Prova ida hodi rezolve kazu direitu penál no direitu prosesuál penál;
 - c) Prova ida na lian-portugés.
3. Prova hotu ba faze eskrita nian, kandidatu sira sei la tau naran, ida ne'e implika anulasaun ba prova hosi júri.
4. Kada prova ba faze eskrita ho durasaun oras tolu nia laran.
5. Ba kada prova faze eskrita nian, sei hili laron ida mesak, hodi halo intervalu mínimu iha laron tolu nia laran.

6. Iha faze eskrita, prova ba koñesimentu sei realiza iha lian-portugés.
7. Ba prova be temi iha alínea a) no b) hosi n.º 2, kandidatu sira hetan akompañamentu, bainhira de'it presiza, hodi halo konsulta ba lejislasaun hotu, jurisprudénsia no doutrina.
8. Diretór mak iha kompeténsia hodi elabora prova koñesimentu ba faze eskrita nian ho nia grella hodi halo koresaun.
9. Iha loron ne'ebé fó-sai pauta ho klasifikasaun ba faze eskrita, sei publika ho grella ne'ebé halo koresaun ba prova ne'e rasik, liuhosi Internét SFJJ nian no nia sede.
10. Júri iha obrigasaun atu respeita kritériu rezultadu iha grella koresaun prova nian, no labele kontraria hodi fó-prejuízu ba kandidatu.
11. Kandidatu sira ne'ebé hetan kalsifikasaun hanesan ka boot liu valór-10 hosi kada prova iha faze eskrita nian, mak admite ba faze orál.

Artigu 20.º

Faze orál

1. Prova ba koñesimentu iha faze oral nia objektivu mak avalia kandidatu nia koñesimentu jurídiku, kapasidade hodi halo krítika, argumentu, espozisaun, espresaun orál no iha domínium ba lian-portugés no tétum ka lae.
2. Faze orál sei halo liuhosi konversa no diskusaun kona-ba matéria sira be fó-sai iha avizu ba abertura konkursu nian, no ho durasaun máximu minutu-60 ba kandidatu ida-idak.
3. Prova ba faze orál hala'o iha públiku, maibé iha faze ida-ne'e, kandidatu sira be siedauk halo prova orál labele partisipa.
4. Iha faze orál, fó resposta tuir lian ne'ebé uza hodi halo pergunta.

Artigu 21.º

Izame psikolójika ba seleksaun

1. Halo izame psikolójika hodi avalia kandidatu sira-nia kapasidade no karaterístika pesoál bainhira hala'o knaar nuudar Majistradu ka Defensoria Públika, liuhosi técnica psikolójika nian.
2. Avaliasaun psikolójika iha durasaun mínima oras ida, hodi garante privasidade izame nian.
3. Entidade ne'ebé halo izame, hakerek paresér ida no temi iha nia konkluziun, «favorável» ka «la favorável», ho fundamenta sira.

4. Paresér ne'e konfidentiál no sei entrega ba júri hosi faze orál nian, hafoin halo tiha prova orál ba kandidatu ne'e. Paresér sira ne'e mós, sei tau-hamutuk ho ata ne'ebé júri prova orál halo ona, hanesan aneksu.
5. Kandidatu ne'ebé hetan «la favorável» bele halo fali izame psikológjiku ho psikólogo sira seluk, tuir nia pedidu ka proposta hosi júri.
6. Ba kazu ne'ebé preve iha númeru kotuk ba, se kandidatu mak husu, nia mak suporta kustu izame nian.
7. Júri mak sei fó-desizaun bainhira iha rezultadu hanesan hosi izame psikológjiku dahuluk no daruak nian.
8. Júri sei fó-desizaun ho fundamentu, bainhira iha diverjénsia hosi izame psikológjiku dahuluk no daruak.
9. Ministru Justisa mak nomeia entidade ne'ebé atu asegura izame psikológjiku.

Artigu 22.º

Kandidatu sira ne'ebé aprova no esklui

1. Kandidatu sira-ne'ebé aprova mak sira be hetan kalsifikasaun hanesan ka liu valór-10 iha kada prova koñesimentu, eskrita no orál, nune'emós, hetan «favorável» iha izame psikológjiku ba seleksaun nian.
2. Hosi hirak be refere iha n.º 2, artigu 18.º, kandidatu sira-ne'ebé esklui mak:
 - a) Sira-ne'ebé hetan klasifikasaun kiik liu valór-10 hosi prova koñesimentu sasá de'it;
 - b) Sira-ne'ebé hetan «la favorável» iha izame psikológjiku ba selesau nian;
 - c) Sira-ne'ebé halo deklarasaun, liuhosi eskrita, hodi dezisti iha loron-ikus ba faze prova orál nian.

Artigu 23.º

Klasifikasaun finál

1. Klasifikasaun hosi kada prova koñesimentu ne'ebé integra iha faze eskrita no orál, nomós, klasifikasaun finál, sei fó-sai iha eskala valór 0 to'o 20.
- 2.. Klasifikasaun finál ba kandidatu ne'ebé aprova, maihosi rezultadu média aritmética simples hosi kalsifikasaun ne'ebé hetan iha faze eskrita no oral ba prova koñesimentu.
- 3.. Kandidatu sira-ne'ebé aprova ona, sei sura hosi orden dekresente tuir klasifikasaun finál.
4. Bainhira kandidatu sira iha klasifikasaun finál ne'ebé hanesan, se fó priviléjju ba grau akadémiku Direitu ne'ebé bootliu, no haree liután ba idade, nune'e sei konsidera liu kandidatu sira be foinsa'e.

Artigu 24.º

Lista ba kandidatu sira ne'ebé aprovalu no lista ba kandidatu sira ne'ebé eskluídu

1. Hafoin halo hotu tiha métudu ba seleksaun no kalsifikasaun finál, júri elabora lista ba kandidatu sira ne'ebé aprovalu no lista ba sira-ne'ebé eskluídu, hodi hatada mós ho motivu.
2. Bainhira Diretór SFJJ fó ona omologasaun ba lista sira-ne'e, sei taka iha sede SFJJ, nomós, publika iha SFJJ nia sítiu internét, maibé laho prejúzu ba n.º 4 hosi artigu 16.º nian.
3. Bele halo reklamasaun ba Diretór SFJJ kona-ba lista sira, iha prazu oras ualu nia laran, sura hosi loron pablikasaun nian.
4. Sei foti desizaun ba reklamasaun sira iha prazu loron sanulu nia laran.
5. Bainhira prazu be temi iha n.º 3, ka desizaun ba reklamasaun mak liu ona, Diretór bele ordena hodi publika iha Jornál Repúblika kona-ba lista definitiva hosi kandidatu sira be aprovalu nomós admitidu ba kursu formasaun nian.

Artigu 25.º

Abilitasaun hodi frekuenta faze teoria-prátika

1. Kandidatu sira be aprovalu, ka, iha asesu imediatu ba kursu hodi frekuenta faze eskolár ba kursu formasaun dahuluk nian, no bainhira vaga ne'e prenxe hotu ona, tuir orden ne'ebé fó-sai iha n.º 3 hosi artigu 23.º.
2. Bainhira kandidatu ne'ebé abilitadu, liuhosi nia rekerimentu, iha esesaun, bele husu ba Diretór SFJJ atu tuir kursu formasaun inisiál hafoin sira-ne'ebé konkursu fó hela asesu, tanba motivu espesiál no aseitável, maibé dala ida de'it.
3. Ba kazu ne'ebé refere iha número kotuk ba, sei admite atu frekuenta kursu formasaun inisiál ba kandidatu tuirmai, konforme ho nia gradusaun.
4. Kandidatu sira-ne'ebé aprovalu no la iha abilidade atu frekuenta faze eskola iha kursu formasaun nian tanba la iha vaga, bele gradua hamutuk ho kandidatu hirak be konkore vaga ne'e, maibé dala ida de'it.

KAPÍTULU IV

ORGANIZASAUN BA KURSU FORMASAUN INISIÁL

SEKSAUN I

Dispozisaun jerál

Aartigu 26.º

Objektivu formasaun inisiál nian

1. Formasaun inisiál nia objektivu maka buka-dalan atu armoniza formandu sira hodi dezenvolve ho kualidade no adkiri kompeténsia téknika, profisionál, linguístika, étika nomós
 2. deontolojia ne'ebé presiza, hodi hala'ó servisu ho kualidade tuir funsaun ne'e rasik.
2. Prosesu ba formasaun inisiál sempre liuhosi avaliasaun no klasifikasaun.

Artigu 27.º

Faze ba kursu formasaun inisiál

1. Formasaun ba Majistradu no Defensór Públiku sira inklui kedas ho faze hirak tuirmai ne'e, no ida-idak ho nia natureza eliminatória:
 - a) Faze ida ba eskola ho durasaun fulan sanulu-resin-ualu;
 - b) Faze ida ba formasaun-prátika ho durasaun fulan-nein;
 - c) Faze ida ba estájju-ingresu ho durasaun fulan sanulu-resin-rua.
2. Faze eskola nia objektivu atu buka-hetan no haklean koñesimentu jurídiku no domina matéria ne'ebé iha ligasaun ho prátika profisionál.
3. Faze baformasaun-prátika nia objektivu mak hakarak buka-dalan atu formandu bele iha kontaktu diretu ho situasaun réal oioin ne'ebé nia sei hasoru bainhira ezerse nia kareira profisionál, ho razaun atu:
 - a) Dezenvolve kapasidade iha abordajen, análise, iha kbi'it atu halo sínteze no hatene rezolve kazu prátiku sira, tuir estudu prosesu réal nian;
 - b) Avalia kapasidade hodi foti-desizaun iha situasaun réal sira;
 - c) Domina téknika prosesuál, tane-aas perspetiva hodi fó-valór ba prova no fundamenta desizaun, ka elabora pesa prosesuál tuir kazu nian.
4. Faze estájju nia objektivu atu:
 - a) Aprofunda no aperfeisoa koñesimentu ne'ebé hetan durante faze uluk kursu nian, hodi konsidera mós prátika-judisiária no espesifisidade hosi kareira ne'e;
 - b) Halo apuramentu ida be loloos ba dezempeñu profisionál nian, ne'ebé haree liu ba kualidade no efisiénsia tuir ezijénsia ba produtividade hodi ezerse funsaun dahuluk kareira nian;
 - c) Halo apuramentu kona-ba resposabilidade no kapasidade hodi halo ponderasaun no foti-desizaun;
 - d) Prenxe lakuna hira be hetan iha nível formasaun jurídika nian, ne'ebé importante tebes hodi ezerse funsaun.

Artigu 28.º

Asiduidade

1. Bainhira iha falta lima ona ka liu, laho justifikasaun, tatur ka lae, ne'e lakon ona frekuénsia.
2. Atu ida be hatuur iha número kotuk ba, bele iha efeitu, sei konsidera mós formandu nia falta no sura tan, se formandu to'o tarde liu minutu-10 nia laran iha seksaun dahuluk nian.
3. Bainhira iha falta hamutuk ruanulu ka liután, laho justifikasaun, tatur ka lae, ne'e formandu jurídiku sei lakon kedas frekuénsia ba formasaun, liuhosi deliberasaun Konsellu Pedagogíjiku nian, bazeia ba Diretór SFJJ nia proposta.
4. Lahó prejuizu ba n.º 3 se formandu hadutu aproveitamentu di'ak maske ho falta ne'ebé barak, Konsellu Pedagogíjiku, haktuir ba Diretór nia proposta, bele autoriza atu formandu frekuenta nafatin kursu.

Artigu 29.º
Justifikasaun ba falta

1. Halo justifikasaun ba falta liuhosi rekerimentu ho modelu rasik, ne'ebé diriji ba Diretór akompaña ho dokumentu komprovativu ba razau falta nian, prazu laron lima nia laran hodi justifika falta ka falta ikusliu, maske barak ona maibé la iha interupsaun.
2. Diretór mak iha kompeténsia hodi foti desizaun kona-ba justifikasaun ba falta nian.
3. Bele hato'o reklamasaun ba Konsellu Pedagogíjiku kona-ba desizaun hodi halo indeferimentu ba justifikasaun, iha prazu laron-10 nia laran sura hosi notifikasaun ba desizaun nian.

SEKSAUN II
Faze formasaun eskola nian

Artigu 30.º
Komponente formativa

1. Faze formasaun eskola ba kursu nian, integra komponente formativa ne'ebé komúm ba kareira profsionál hotu-hotu, ne'ebé tenke abranje matéria hirak tuirmai:
 - a) Direitu Fundamentál no Direitu Konstitusionál;

- b) Organizasaun sistema polítiku;
- c) Direitu organizasaun administrativa;
- d) Étika no deontolojia profisionál;
- e) Edukasaun sívika no direitu sidadania;
- f) Planeamentu, jestaun no lideransa;

- g) Lian- portugés no lian-tétum, tuir perpestiva atu uza tékniku-jurídika;
- h) Teknolojia informasaun no komunikasaun ba prátika jurídika no judisiária.

2. Sei iha tán komponente formativa espesífika ida, ne'ebé tenke hola-parte mós matéria sira tuirmai ne'e:

- a) Direitu Sívili no Direitu Prosesuál Sívil;
- b) Direitu Penál no Direitu Prosesuál Penál;
- c) Direitu Família no Labarik sira;
- d) Direitu Traballu, substantivu no prosesuál;
- e) Direitu Sosiedade Komersiál;
- f) Direitu Administrativu substantivu no prosesuál.

3. Univade letiva ba matéria ne'ebé refere iha número sira liubá, sei adapta tuir funsaun espesífika ba kareira profisionál ida-idak nian, conforme ho planu formasaun kada kursu nian, ne'ebé temi iha artigo 5.º.

Artigu 31.º

Organiza atividade formativa

1. Atividade ba faze eskola nian, sei realiza iha sede SFJJ ho orientasaun hosi dosente no formadór sira, ne'ebé iha kompeténsia hodi fó matéria ho komponente formativa oioin.
2. Atividade formasaun iha SFJJ inklui mós aula ho teoria no sesaun prátika regulár hosi grupu ka hosi konjuntu grupu formandu sira;
3. Atividade formasaun nian, liuliu, la'ós iha sede SFJJ, bele inklui mós *workshops*, kursu ho especialidade, kolókiu, palestra, konferénsia no semináriu.

Artigu 32.º

Organizasaun no kompoziasaun ba turma

1. Turma sira tenke iha, másimu, formandu na'in-15.
2. Atu fahe formandu sira ba turma ida-idak tenke halo ho forma ne'ebé ekilíbriu, respeita kritériu jéneru, idade, esperiéncia profisionál, nível koñesimentu, klasifikasaun konkursu ingresu nian, no, hirak seluk ne'ebé importante.

Artigu 33.º

Sumáriu ba sesaun formativa

1. Dosente ka formandór ne'ebé responsável mak elabora fixa ba kada sesaun formativa, hodi hakerek sumáriu badak kona-ba matéria ne'e rasik.
2. Tenke fahe fixa sumáriu nian ba formandu iha kada sesaun dahuluk.

Artigu 34.º

Kontrola prezensa

Halo kontrola ba prezensa iha kada sesaun servisu, liuhosi sistema asina surat-tahan, ne'ebé sei rekolla iha minutu sanulu hafoin oras ne'ebé marka ona hodi hahú sesaun.

Artigu 35.º

Avaliasaun ba faze eskola

1. Iha faze ikus eskola nian, sei avalia formandu tuir eskala hosi valór 0 to'o 20 ba komponente letiva ida-idak ne'ebé integra iha konteúdu kurikulár nian.
2. Dosente no formadór sira mak sei avalia formandu iha kada komponente letiva, tuir modelu avaliasaun kontínua-globál, no, tenke konsidera no haree-didi'ak valór hirak tuirmai:
 - a) Koñesimentu tékniku-sientífiku;
 - b) Kultura jurídika no jerál;
 - c) Kapasidade hodi foti desizaun;
 - d) Ponderasaun;
 - e) Kapasidade hodi servisu;
 - f) Relasaun nuudar ema;
 - g) Dixiplina no komportamentu;
 - h) Kapasidade hodi organiza no métudu;
 - i) Partisipasaun;
 - j) Asiduidade no pontualidade.
3. Sei fó ba formandu ida-idak klasifikasaun média finál nian, sura tuir valór ne'ebé hetan iha kada dixiplina, ne'ebé defini ona hosi planu kursu ne'e rasik.
4. Durante faze eskola, planu kursu nian, bele preve avaliasaun interkala, ho natureza eliminatória, hodi hatuur loloos presupostu sira ne'e.
5. Bainhira dosente no formadór sira fó klasifikasaun finál, tenke fundamenta tuir informasaun fulan-fulan nian, no tau iha formandu ida-idak nia prosesu.

Artigu 36.º

Prosedimentu ba avaliasaun no notasaun

1. Durante faze formasaun eskola nian, dosente no formadór sira la'ós hatada de'it ba Diretór, liuhosi eskrita, informasaun finál, maibé mós informasaun fulan-fulan nian kona-ba formandu ida-idak, bazeia ba traballu lubuk ida, inklue

rezultadu hosi prova nomós formadu sira-nia intervensaun ne'ebé sira halo iha periúdu informasaun ne'e.

2. Iha faze eskola nian, Diretór sei rona dosente no formadór hotu-hotu kona-ba informasaun fulan-fulan no finál nian, hodi prepara proposta kalsifikasaun ida ba kada formandu.

3. Prosesu ne'ebé refere iha n.º 2, aplika mós ba avaliasaun interkala ne'ebé preve iha n.º 4 hosi artigu kotuk nian.

4. Diretór mak elabora relatóriu finál ne'ebé submete ba Konsellu Pedagogójiku no Dixiplinár.

5. Konsellu Pedagogójiku no Dixiplinár mak iha kompeténsia hodi delibera no aprova informasaun finál ba kada formandu, no fó gradusaun tuir orden dekresente.

6. Formandu sira ne'ebé iha informasaun finál pozitiva mak admite ba faze formasaun-prátika nian.

7. Iha prazu loron tolu nia laran, sura hosi loron publikasaun ba lista gradusaun, formandu sira bele hatudu, tuir orden dekresente, fatin ne'ebé sira hakarak atu koloka ba, tuir indikasaun ne'ebé disponível hosi instituisaun profisionál ne'ebé sira atu bá.

8. Sei konsidera kolokasaun hanesan hetan gradusaun iha faze eskola nian.

SEKSAUN III

Faze ba formasaun-prátika

Artigu 37.º

Formasaun-prátika

1. SFJJ kolabora ho instituisaun nee'bé reprezenta kareira profisionál mak organiza faze formasaun-prátika, ne'ebé formandu hakarak integra no realiza ba, tuir nia planu rasik, omologadu ho Kosellu Jerál ne'ebé iha kompeténsia hodi elabora no halo akompañamentu.

2. Faze formasaun-prátika hala'o hamutuk iha instituisaun judisiária ne'ebé iha relasaun ho kareira profisionál be formandu hakarak.

3. Atu halo akompañamentu tékniku lorloron ba formandu hodi haktuir ba objektivu sira be defini iha n.º 3 hosi artigu 27.º, Konsellu Superiór Majistradu Judisiál, Konsellu Majistradu hosi Ministériu Públiku nomós Konsellu Superiór Defensoria Públika nian, tenke nomeia orientadór ida nuudar responsável, ne'ebé dezempeña funsau ida-ne'e no kolabora hamutuk ho kordenadór ida be SFJJ mak hii.

4. Orientadór iha responsabilidade hodi promove no garante katak formandu partisipa ativa ba aktu hotu-hotu no asaun espesífika kona-ba kareira profsionál nian, liuliu, hanesan:

- a) Halo kontaktu iha prosesu práttiku kona-ba artikuladu, promosaun, despaxu no desizaun hirak seluk;
- b) Fó assisténsia iha reuniaun ho parte no mandatáriu sira, nune'e mós, bainhira iha deliberaun ho órgaun desizór;
- c) Audénsia ba tentativa hodi halo konsiliaun, diskusaun no julgamentu.

Artigu 38.º

Avalisaun iha faze formasaun-prátika

1. Orientadór no kordenadór, mesak ka hamutuk, elabora informasaun ida iha fulan-fulan, kona-ba dezempeñu no evolusaun hosi formandu, hodi haruka ba Diretór.

2. Iha faze ikus práttika nian, kordenadór no orientadór hamutuk elabora relatóriu ida hosi kada formandu, kona-ba apresiasaun jerál, hodi konsidera mós ezersísiu ba knaar aban-bainrua nian, nune'e sei konsta iha parámetru ne'ebé defini ona hosi planu ba formasaun kursu ne'e rasik, hanesan:

- a) Kuantidade no kualidade ba traballu dezenvolidu;
- b) Ponderasaun no sensibilidade jurídika;
- c) Kapasidade ba desizaun;
- d) Kapasidade ba inisiativa no organizasaun;
- e) Pontualidade no asiduidade;
- f) Relasionamentu interpesoál ho superiór ierárkiku no kolega sira;
- g) Fasilidade iha espresaun orál no eskrita, nomós, esforsu ba aperfeisoamentu.

3. Ba kada formandu sei fó klasifikasaun hosi eskala ho valór 0 to'o 20, no, sei hasai hosi faze estájiu tuirmai, ba formandu sira ne'ebé hetan nota ki'ikliu fali valór 10.

4. Ba kazu ne'ebé iha justifikasaun duni, Konsellu Pedagójiku no Dixiplinár SFJJ bele delibera ho forma ida hodi proroga faze formasaun-prátika, aleindé períudu ne'ebé preve iha alínea b) n.º 1 hosi artigu 27.º, bainhira de'it prorogasaun ne'e presiza la'ó duni hodi fó-kapasitasaun profsionál ba formandu ida.

5. Iha momentu sasá de'it ba faze formasaun-prátika nian, Konsellu Pedagójiku no Dixiplinár SFJJ bele delibera hodi hasai formandu, bazeia ba informasaun iha kada fula rua-rua nia laran, la iha aproveitamentu to'o finál.

Artigu 39.º

Klasifikasaun finál ba kursu no graduasaun

1. Iha faze ikus hosi prátika-formasaun, kandidatu sira ne'ebé liu, sei gradua tuir orden dekresente haree ba nia klasifikasaun finál no kareira profisionál ne'ebé nia atu ezerse ba.
2. Sei sura Klasifikasaun finál ida-ne'e tuir média aritmética hosi kalsifikasaun sira be hetan iha faze eskola nomós faze prátika-formasaun, no tau konsiderasaun ba hirak tuirmai ne'e:
 - a) Klasifikasaun finál hosi faze eskola vale % 40;
 - b) Klasifikasaun finál hosi faze prátika vale % 60.
3. Bainhira iha klasifikasaun ne'ebé hanesan, sei konsidera no hare liu ba klasifikasaun finál ne'ebé boot hosi faze prátika, eskola, no ikusliu, maka klasifikasaun finál boot hosi konkursu ingresu nian.
4. Hafoin Konsellu Pedagogíku no Dixiplinár SFJJ aprova ona, lista ba kaslifikasaun no gradusaun hosi kandidatu sira ne'ebé liu, sei taka iha sede SFJJ no publika iha Série II Jornál Repúblika nian.

SEKSAUN IV

Faze estájiu

Artigu 40.º

Nomesaun no ezekusaun iha faze estájiu

1. Tuir termu artigu kotuk nian formandu sira ne'ebé aprova ona, konforme kazu no iha rejime estájiu, sei hetan nomesaun nuudar juís, prokuradór ka defensór públiku hosi instituisaun judisiária refere.
2. Bainhira de'it mak la iha nomesaun, sei mantein estatutu nuudar formandu jurídiku.
3. Hafoin hetan nomeasaun, majistradu no defensór públiku sira ezerse tuir responsabilidade ba funsaun ne'ebé liga ho kareira profisonál rasik, no iha direitu, devér nomós inkompatibilidade ne'ebé hatuur iha estatutu ne'e.
4. Atu estájiu bele la'o-di'ak, Konsellu Superiór hosi instituisaun judisiária rasik mak nomeia orientadór ida hodi halo supervizaun, no nia mós iha kompeténsia hodi elabora no halo akompañamentu iha SFJJ, no tuir planu individuál ne'ebé Konsellu Superiór aprova ona.
5. Bainhira SFJJ iha iniciativa rasik ka instituisaun judisiária refere mak husu, bele organiza formasaun komplementár hodi atualiza estajiáriu sira-nia koñesimentu, ka, debate ho tema kona-ba atualidade jurídika nian.
6. Bainhira faze estájiu ramata, orientadór sira halo reuniaun ho Diretór no kordenadór formasaun hodi entrega no diskute kona-ba formandu ida-idak nia nota.

7. Bainhira iha faze estájiu nia laran mak hetan elementu ne'ebé hatebes katak kandidatu hala'o nia knaar la loos karik, Konsellu Superiór sei ordena hodi halo inspesaun estraordinária ho karatér urjente kona-ba desempeñu profisionál ne'e duni, tuir termu ne'ebé preve iha estatutu kareira profisionál ne'e.

8. Se hasai kedas kandidatu bainhira nia hatudu duni la iha kapasidade.

9. Bainhira faze estájiu ramata, sei nomeia kandidatu sira be iha aptidaun tuir termu definitivu no tau iha rejime efetividade ba kareira profisionál ne'ebé sira hili ona, bazeia ba kategoria ne'ebé iha konformidade ho Estatutu ne'e rasik.

KAPÍTULU V
ESTATUTU BA FORMANDU JURÍDIKU NO REJIME DIXIPLINÁR
SESAUN I
Estatutu Formandu Jurídiku SFJJ nian

Artigu 41.º
Estatutu Formandu Jurídiku

1. Kandidatu sira ne'ebé aprova iha konkursu ingresu sei tuir kursu formasaun dahuluk ho estatutu nuudar formandu SFJJ no tenke haktuir rejime ba direitu no devér ne'ebé hakerek iha diploma ida-ne'e, regulamentu SFJJ nian, nomós, Estatutu Funksaun Públika.

2. Estatutu nuudar formandu jurídiku SFJJ, sei hetan liuhosi asina kontratu ba formasaun hosi kandidatu be aprova ona iha konkursu ho Estadu, ne'ebé reprezenta hosi Diretór SFJJ.

3. Kontratu ne'ebé refere iha número kotuk, ba kazu saida de'it, la konfere kualidade hosi funsionáriu administrasaun públika nian.

4. Frekuénsia ba kursu formasaun inisiál iha SFJJ konfere ba formandu jurídiku, direitu hodi simu bolsa ba formasaun, ka ba kazu sira be preve iha artigu tatur, no tuir opsaun hosi formandu, renumerasaun ba kategorai ka kargu hosi servisu ne'ebé nia mai.

5. Valór ba bolsa formasaun ne'ebé refere iha número kotuk ba, sei hatuur iha termu n.º 2 hosi artigu 73.

6. Formandu iha direitu hodi goza férias sira ne'ebé la iha ligasaun ho periudu letivu hosi kursu formasaun ne'e rasik.

7. Se lakon kursu formasaun tanba la frekuenta no sei aplika pena-espulsu, ne'ebé la'ós de'it hakotu kedas estatutu nuudar formandu jurídiku, maibé sei lakon kontratu ba formasaun, nomós direitu ba bolsa formasaun nian.
8. Bainhira Diretór SFJJ liuhosi nia despaxu aseita ona, efektu sira be refere iha n.º 7 la'o kedas iha loron tatur notifikasaun, hodi hasai ka fó-espulsu ba formandu jusídiku, ka, tanba kazu dezistencia.

artigu 42.º

Kandidatu sira nuudar funsionáriu públiku ne'ebé aprova ba kursu formasaun

1. Kandidatu sira-ne'ebé nuudar funsionáriu públiku, ne'ebé atu frekuenta kursu formasaun la depende ba autorizasaun hosi órgaun ka sira- nia servisu-fatin.
2. Hahú hosi loron simu pose, kandidatu sira-ne'ebé atu tuir kursu formasaun, nuudar funsionáriu públiku no kona-ba sira-nia kargu, sei haktuir rejime lisensa laho vensimentu ne'ebé preve iha Estatutu Funsun Públika nian.
3. Bainhira faze formasaun eskola ne'ebé preve iha alínea a) n.º 1 hosi artigu 27.º remata ona, kandidatu sei adopta hodi mantein relasaun ho servisu públiku, ka mantein hodi kontinua kursu formasaun, se konsidera lakon relasaun servisu iha Administrasaun Públika nian.
4. Kandidatu sira-ne'ebé nuudar funsionáriu públiku, bele hetan bolsa formasaun be preve iha artigu 73.º, ka hosi alternativa, bele opta hodi hetan bolsa ho valór ne'ebé hanesan ho renumerasaun tuir kategoria ka kargu orijen.

Artigu 43.º

Identifikasaun no prosesu individuál ba formandu

1. Sei identifika formandu sira liuhosi kartaun identifikasaun tuir modelu ne'ebé aprova iha regulamentu internu SFJJ, ne'ebé publika iha série daruak (2.º) Jornál Rápública nian.
2. SFJJ tenke organiza no atualiza nafatin prosesu individuál hosi kada formandu, no presiza tau-hamutuk:
 - a) Dokumentu sira be komprova rekizitu ba admisaun;
 - b) Rezultadu konkursu hodi tama iha formasaun;
 - c) Informasaun fulan-fulan nian;
 - d) Klasifikasaun finál ba kada faze;
 - e) Informasaun finál kona-ba formandu nia aproveitamentu ka la iha aproveitamentu;
 - f) Informasaun kona-ba asiduidade no rejistu falta nian;

- g) Elementu sira seluk be iha ligasaun ho formandu nia situasaun, liuliu, sansaun dixiplinár.

Artigu 44.º

Devér permanénsia iha kareira

Formandu ne'ebé laho justa-kausa demiti molok tinan-tolu nia laran kona-ba nomeasaun ba kareira ne'ebé kursu formasaun iha asesu ba, tenke reembolsa fali ba Estadu montante hanesan hosi valór bolsa ne'ebé nia simu durante iha formasaun.

Artigu 45.º

Formandu jurídiku nia direitu

1. Formandu SFJJ iha direitu atu:

- a) Partisipa ativa no fó-krítika ba prosesu formasaun nian;
- b) Propoe atu realiza semináriu, palestra, debate, vizita-estudu no atividade sira leluk iha formasaun nia laran;
- c) Hatene rezultadu hosi nia prestasaun iha atividade formasaun nian, no konsulta nia prosesu individuál iha tempu tomak;
- d) Kontribui atu SFJJ bele la'ó ho dia'k no apresenta sujestaun ba Diretór;
- e) Hili nia representante ba Konsellu Pedagójiku;
- f) Iha asesu ba instalasaun SFJJ nian, no bainhira iha autorizasaun, uza materiál nune'e mós ekipamentu sira;
- g) Frekuenta aula no partisipa iha atividade kurikulumár sira;
- h) Reklama nia klasifikasaun no husu hodi halo revizaun ba instrumentu ida ka liu, hosi avaliasaun nian.

2. Formandu sira iha direitu, tempu balu nia laran, hodi hasoru malu ho Diretór, tanba Diretór nia inisiativa, ka formandu sira-nia inisiativa, bainhira iha kestaun sasá de'it ne'ebé presiza Diretór nia kompeténsia hodi fó-apresiasaun urjente.

Artigu 46.º

Formandu nia devér

Hosi devér hirak be iha ligasaun ho estatutu, formandu jurídiku sira mós sei iha tán devér tuirmai:

- a. Devér-asiduidade katak formandu iha obrigasaun hodi asisti lorloron atividade ne'ebé liga ho nia.
- b. Devér-kolaborasaun kona-ba disponibilidade hodi hola-parte iha órgaun jestaun SFJJ nian, ne'ebé lei preve formandu sira-nia partisipasaun, nomós, hodi

hala'õ knaar hanesan representante hosi grupu formandu nian tuir termu ne'ebé hatuur ona iha lei no regulamentu internu.

c. Devér-koresaun katak formandu iha obrigasaun hatudu respeito no edukasaun ba ema hotu iha formasaun, kolega, funcionáriu no utilizadór servisu nian.

d. Devér-obidiénsia katak formandu iha obrigasaun atu kumpre orden no instrusaun ne'ebé fó-sai hosi órgaun competente SFJJ nian.

e. Devér-partisipasaun katak formandu iha obrigasaun atu kaer-metin nafatin konduta, fó-an tomak no servisu-hamutuk iha atividade formasaun nian.

f. Devér-pontualidade katak formandu iha obrigasaun atu to'õ iha atividade ne'ebé programa ona tuir oras.

g. Devér-sijilu katak formandu iha obrigasaun atu la konta-sai segredu hosi faktu no prosesu ne'ebé nia hatene kona-ba atividade formasaun, no satán segredu kona-ba justisa ka segredu profisinál nian.

h. Devér-jelu katak formandu iha obrigasaun atu koñese no haree-di'ak norma legál, regulamentu no instrusaun atu formasaun no funcionamentu iha SFJJ bele la'õ ho dixiplina.

Artigu 47.º

Partisipa iha formasaun

Formandu jurídiku bele sai nuudar koresponsável ba nia formasaun, laho prejuízu ba nia obrigasaun jerál no aproveitamentu, bele bolu hodi organiza atividade pedagójika nomós kolabora iha jestaun servisu internu SFJJ nian

SEKSAUN II

Responsabilidade dixiplinár

Artigu 48.º

Infrasaun dixiplinár

Sei konsidera hanesan infrasaun dixiplinár, bainhira nuudar negligente hela, formandu pratika violasaun ba devér sira ne'ebé preve iha artigu 46.º.

Artigu 49.º

Sansaun

1. Sei aplika ba formandu jurídiku SFJJ nian, sansaun sira tuirmai:

- a) reprensaun rejistada;
- b) Fó-suspensaun to'õ fulan ida;
- c) Fó-espulsu.

2. Bainhira iha falta hodi kumpre pena suspensaun nian, ne'e la konta ba efeitu ne'ebé preve iha artigu 28.º.

3. Pena suspensaun bele determina, iha períudu hanesan, hodi lakon bolsa ba formasaun ne'ebé refere iha artigu 41.º.

Artigu 50.º

Prosesu dixiplinár

Bainhira aplika pena ne'ebé preve iha artigu kotuk ba, sempre halo uluk lai prosesu dixiplinár, tuir termu Estatutu Funsau Públika nian.

Artigu 51.º

Medida kautelár ba suspensaun preventiva

Diretór SFJJ nian, bele fó-suspensaun preventiva to'o lora-15 nia lara, ba formandu jurídiku hodi kumpre prosesu dixiplinár, bainhira iha frekuénsia ativadade formasaun nian hatudu katak pertuba tebes dixiplina.

Artigu 52.º

Kompeténsia hodi aplika sansaun dixiplinár

Iha kompeténsia atu aplika sansaun mak:

- a) Diretór SFJJ, ba sansaun ne'ebé preve iha alínea a) hosi artigu 49.º;
- b) Konsellu Pedagójiku no Dixiplinár ba sansaun hirak seluk.

Artigu 53.

Reklamasau no rekursu

1. Diretór nia desizaun ne'ebé aplika sansaun-dixiplinár, bele halo reklamasau ba Konsellu Pedagójiku no Dixiplinár SFJJ, iha prazu lora uala nia lara, sura hosi notifikasaun.

2. Bainhira Konsellu Pedagójiku no Dixiplinár aplika desizaun, atu konfirma ka revoga sansaun-dixiplinár ida, bele hato'o rekursu ierárkiku ne'ebé presiza ba Ministériu Justisa iha prazu lora uala nia lara, sura hosi notifikasaun.

3. Atu halo interpoziasau ba reklamasau, ka, ba rekursu ierárkiku ne'ebé preve iha número-1 no 2, sei suspende keda sansaun-dixiplinár ne'ebé aplika ba.

4. Ba desizaun sira be atu aplika ba, hodi konfirma ka revoga sansaun-dixiplinár ida, tenke hato'o lai rekursu-kontensiozu ba tribunál, tuir termu jerál direitu nian, ho efeitu devolutivu ne'ebé simples.

5. Ba sansaun-espulsu nian, se halo rekursu-kontensiozu ne'e'bé refere iha número kotuk ba, hodi halo julgamentu, no tuir tempu ne'ebé presiza ba desizaun, tenke hapara hosi kursu-formasaun, no, formandu iha direitu hodi hadi'ak fali situasaun ne'e, bainhira se la aplika sansaun ne'e, inkui mós ho :

- a) Direitu atu simu retroativa hosi bolsa formasaun nian ne'ebé nia lakon tiha, to'o finál kursu-formasaun ne'ebé nia frekuenta ba;
- b) Direitu hodi frekuenta kursu tatur keda, ne'ebé konsidera abilitadu ba nia frekuénsia, laho nesiedade hofo fó-prova, nune'e, sei gradua tuir vaga ne'ebé nia kompete ba, hodi sura mós klasifikasaun ne'ebé nia hetan iha kursu uluk nian.

6. Ba situasaun ne'ebé refere iha número liuba, formandu bele reintegra fali ba kursu tatur be ekivalente ho kursu ida uluk nian, bainhira kona sansaun dixiplinár, esepu formandu deklar hakarak tuir fali kursu hosi inísiu.

Artigu 54.º

Efetu espeial ba sansaun

Bainhira infrator nuudar funsionáriu públiku ka ajente Estadu karik, SFJJ komunika ba nia superior ierarkiku hodi aplika saunsaun ne'ebé preve iha alínea c) no d) hosi artigu 49.º.

KAPITULU VI

FORMASAUN KONTÍNUA NO KOMPLEMENTÁR

SEKSAUN I

Formasaun kontínua

Artigu 55.º

Kursu ba formasaun kontínua

1. SFJJ organiza no fó-dalan hodi halo kursu formasaun kontínua, ho objektivu atu promove kareira iha tempu-naruk ho especialidade, halo aprefeisoamentu, atualiza no valoriza ema no profesionál majistradu, defensor públiku nomós ajente sira seluk tán hosi setór justisa nian.

2. Formasaun kontínua bele iha modalidade sira tuirmai:

- a) Formasaun ba aperfeisoamentu ho objektivu atu hakle'an no hadi'ak liután kapsidade sira ne'ebé iha ona;
- b) Formasaun ho especialidade ne'ebé ho objektivu atu konfere no dezenvolve ka aprofunda koñesimentu nomós aptidaun profesionál, liuliu,

kona-ba téknika ka área-sabér hodi oferese exersísiu espesializadu tuir funsaun ne'ebé koreponde ba domínio nian.

- c) Formasaun hodi prove kareira tuir kazu no termu ne'ebé rejime preve ona, ho objektivu atu espesifika dezenvolvimentu la'os de'it iha koñesimentu, maibé mós ba aptidaun profisionál nian, ne'ebé tenke halo duni, hodi nune'e bele ezerse funsaun ho kompelsidade be boot tebes no iha responsabilidade ba kareira ne'e rasik.

Artigu 56.º

Tipu

1. Sei organiza formasaun kontínua hanesan:
 - a) Kursu formasaun ho durasaun ki'ik, média no naruk;
 - b) Semináriu, enkontru, jornada, palestra, konferénsia no estájiu.
2. Asaun ba formasaun bele mós iha ámbitu jerál ka espesializadu, nomós, bele espesífiku ba kareira profisionál ida-idak nian.
3. Bele organiza mós asaun conjunta ne'ebé destina ba profisionál hotu be hola-parte iha ámbitu administrasaun justisa nian.

Artigu 57.º

Organiza atividade

1. SFJJ asegura planeamentu globál no organiza asaun ba formasaun kontínua hodi observa prinsípiu kona-ba diversifikasaun tuir área funsaun nian, espesialidade nomós multidixiplinár ba tema.
2. Atu realiza programa ba asaun formasaun-kontínua nian, SFJJ ho inisitiva rasik ka bele artikula hodi husu ba entidade seluk, liuliu, liuhosi protokolu nomós instrumentu koperasaun sira seluk.
3. Bele mós organiza asaun ba formasaun-kontínua liuhosi koperasaun ho entidade rai-li'ur sira ne'ebé responsabiliza ba formasaun majistradu nian.
- 4.. Bainhira SFJJ iha justifikasaun, liuliu, verifica kona-ba reforma lejislativa ne'ebé presiza duni, bele organiza asaun ba formasaun ho espesialidade ho objektivu atu atualiza koñesimentu ka halo kolokasaun ba profisionál iha setór ka servisu foun.

Artigu 58.º

Planu anuál ba formasaun kontínua

1. Atividade kona-ba formasaun kontínua konsta iha planu anuál ba formasaun kontínua, ne'ebé integra iha planu anuál hosi atividade SFJJ nian.

2. Bainhira atu elabora planu anuál ba formasaun kontínua, sei rona orgaun representante hotu ka superiór ierárkiku hosi kareira oioin no profisionál setór justisa nian.
3. Ezekusaun planu anuál ba formasaun kontínua konsta iha relatóriu anuál hosi atividade SFJJ nian.

Artigu 59.º

Divulgasaun kona-ba planu anuál ba formasaun kontínua

1. Sei divulga planu ba formasaun-kontínua iha SFJJ nia fátin, inetrnét, bainhira iha aprovasaun ona tuir termu n.º 5 hosi artigu 4.º kona-ba planu anuál ba atividade SFJJ nian, nomós sei haruka ba servisu no instituisaun setór justisa hodi hatudu númeru ba vaga be disponível ba kada asaun formasaun nian.
2. Ba prazu sira be SFJJ defini ona, servisu ka instituisaun ne'ebé temi iha númeru kotuk, tenke hatudu ba SFJJ formandu sira-ne'ebé atu frekuenta atividade formasaun ne'e.
3. SFJJ iha loron-15 tatur komunkasaun ne'ebé refere iha númeru liuba, tenke fó-hatene ba sira ne'ebé hetan-autorizasaun hodi partisipa iha formasaun.
4. Sei komunika ba superiór ierárkiku ka Konsellu Superiór kona-ba falta hosi sira ne'ebé interesadu no admitidu ona ba formasaun.

Artigu 60.º

Avalisaun ba formasaun

1. Sei avalia nafatin iha formasaun kontínua, haree hosi funsaun ba objektivu kada asaun nian, ka hosi formandu sira-nia nível dezempeñu profisionál.
2. Kona-ba funsaun hosi objektivu kada asaun formasaun nian, bele adota instrumentu ba avaliasaun sira tuirmai:
 - a) Prova ba koñeimentu, bainhira de'it hakarak-haree nível efikásia hosi partisipante ida-idak nian to'o iha ne'ebé ona;
 - b) Metodolojia ba dinámika grupu nian, halo simulasaun ka métudu ba kazu sira, bianhira de'it hakarak verifika nível alterasaun hosi partisipante sira-nia kapasidade;
 - c) Kestionáriu kona-ba avaliasaun asaun formasaun nian, bainhira de'it pretende avalia formandu sira-nia reasaun, konsekusaun ba objektivu no asaun sira, nomós ba nível tékniku-pedagójiku rasik.

Artigu 61.º

Sertifikadu ba frenkuénsia no aproveitamentu

Tuir pedidu hosi sira-ne'ebé iha interese, SFJJ sei fó sertifikadu kona-ba frekuénsia ka aproveitmentu hosi partisipante iha formasaun kontínua.

SEKSAUN II

Formasaun komplementár

Artigu 62.º

Kursu ba formasaun komplementár

1. Asaun ba formasaun komplementár hola-parte iha ámbitu atribuisaun SFJJ, ne'ebé refere iha n.º 4 hosi artigu 2.º diploma ida-ne'e.
2. Sei realiza asaun ba formasaun komplementár tuir SFJJ nia iniciativa, ka instituisaun ne'ebé iha interese solisita maibe tenke prezenta ho antesedénsia, no medida disponibilidade hosi SFJJ.

KAPÍTULU VII

REJIME BA AJENTE FORMASAUN IHA SFJJ

SEKSAUN I

Dispozisaun jerál

Artigu 63.º

Ajente ba formasaun

1. Sei asegura atividade ba kursu formasaun inisiál iha SFJJ, hanesan:
 - a) Iha faze formasaun eskola, hosi dosente no formadór SFJJ;
 - b) Iha faze prátika no estájiu, Konsellu Superiór mak hili orientadór sira, tuir kareira ne'ebé formandu hakarak hola-parte ba, hamutuk ho kordenadór ne'ebé SFJJ mak nomeia.
2. Iha atividade kursu formasaun kontínua, hosi dosente no formadór sira SFJJ nian, dosente, formadór no kolaboradór nasionál ka estranjeiru mós bele participa, ne'ebé iha rekoñesimentu ba kompeténsia sientífika, pedagójika ka profisinál, no haree katak iha kolaborasaun hodi tau-interese ba dóminiu formasaun ne'e rasik.
3. Ba dosente no formadór nasionál SFJJ, remunerasaun fiksa tuir termu n.º 1 hosi artigu 73.º.

Artigu 64.º

Dosente no formadór ba kursu formasaun dahuluk nian

1. Tenke kareira majistradu, defensór públiku, dosente universitáriu ka doutór no mestre iha Direitu ho esperiéncia profisionál ne'ebé relevante ba área formasaun

ne'e duni mak sai dosente no formador ba area juridika hosi kursu formasaun inisal ba magistradu sira.

2. Sei rekrua espesialista ne'ebé iha rekoñesimentu tuir méritu profisionál, sientífiku no pedagójiku iha área formasaun ne'e duni hodi sai dosente no formador ba área formasaun sira seluk.

3. Lahó prejuizu ba verifikasaun kona-ba rekizitu be temi ona iha número sira liuba, dosente no formador hosi SFJJ bele mós hili espesialista ne'ebé entidade nasionál ka estranjeiru hatudu, bazeia ba akordu ne'ebé SFJJ estabesele ona hodi kopera iha formasaun.

4. Tau-sees tiha hosi kazu ne'ebé preve ona iha número kotuk ba, kontratu ba dosente no formador SFJJ, tenke halo liuhosi konkursu públiku.

Artigu 65.º

Rejime ba dosente no formador sira iha SFJJ

1. Dosente no formador SFJJ, ezerse funsaun tuir rejime tempu tomak ka tempu balu de'it.

2. Número total ba oras servisu semana ida nian, tuir rejime tempu tomak no tempu balu de'it, ne'e inklui ona aula, preparasaun no fó-apoiu asisténsia ba formandu sira, maibé la bele menús liufali oras-10 ka oras-6 iha semana ida nia laran.

3. Oráriu servisu ba dosente la'ós integra de'it tempu lesionasaun nian, maibé iha mós komponente ne'ebé relasiona ho servisu hodi fó-apoiu no fó-asisténsia ba formandu sira, no tenke koresponde, másimu, metade hosi tempu ida-ne'ebá.

Artigu 66.º

Rejime ba nomeasaun

1.. Ministru Justisa mak nomeia dosente no formador SFJJ, bazeia ba Diretór nia proposta, tuir sekuénsia competente hosi prosesu rekrutamentu, hafoin rona tiha Konsellu Pedagójiku.

2. Dosente no formador be servisu iha tempu tomak sei nomeia hosi komisaun servisu ho períudu tinan-3, bele renova, ho períudu ne'ebé hanesan no dala ida de'it.

3. Dosente no formador ho rejime tempu parsiál, sei hetan nomeiasaun tuir durasaun hosi kursu formasaun:

- a) Ba rejime komisaun servisu no akumulasaun ho funsaun hosi kariera orijen nian, se majistradu, defensór públiku, funcionáriu ka ajente Estadu ne'ebé iha efetividade ho funsaun sira;
 - b) Rejime kontratu servisu ho termu sertu, ba kazu sira seluk tán.
4. Ba situasaun kursu ho durasaun tempu-badak no tempu-média, sei nomeia formadór sira tuir períudu ne'ebé koreponde ba kursu be sira hetan kontratu ba.
5. Bainhira noemasaun be refere iha número-2 no 3 monu karik ba majistradu, defensór públiku ka funcionáriu no ajente Estadu nian, tenke hetan autorizasaun hosi Kosellu Superiór ne'e duni ka órgaun másimu ne'ebé tutela ba, no depende ba kazu sira.

Artigu 67.º

Hamenus servisu

Ba dosente no formadór sira ne'ebé hetan nomeiasaun tuir termu alínea a) número 3 hosi artigu, bele mós hatada pedidu ba Konsellu Superiór, hodi hamenus servisu iha tempu balu nia laran tanba iha formandu barak no servisu ne'ebé nia dezempeña ba mós todan.

Artigu 68.º

Funsaun dosente sira SFJJ nian

Dosente sira iha kompeténsia atu:

- a) Partisipa hodi halo planifikasaun ba atividade iha faze formasaun eskolár no prátika, nune'e mós, prepara planu estudu nian;
- b) Elabora programa no sumáriu kona-ba matéria tuir área ne'ebé iha ligasaun ho formasaun no bazeia ba planu sira be hetan ona aprovasaun;
- c) Hanorin, organiza no diriji seksaun iha grupu hodi asegura akompañamentu pedagójiku ne'e rasik;
- d) Koordena iha elaborasaun ba materiál apoiu estudu nian no organiza bibliografia tuir área tématika ne'ebé nia responsabiliza ba, iha lian-ofisiál rua;
- e) Halo avaliasaun ba formandu jurídiku sira;
- f) Partisipa no intervein ba atividade hirak seluk hosi formasaun nian iha ámbitu formasaun kontínua no komplementár, nune'e mós, ba atividade estudu no investigasaun ne'ebé SFJJ realiza;
- g) Ezerse funsaun tuir estrutura SFJJ nian, bainhira preve krik nia intervensaun;
- h) Halo paresér bainhira Diretór husu, tuir matéria no área hirak e'ebé afetadu hela;
- i) Hola-parte iha komisaun ka grupu traballu nian, ne'ebé husu intervensaun hosi SFJJ tuir Diretór nia desizaun;

- j) Dezempeña funsaun hirak seluktán ne'ebé preve iha lei no regulamentu internu SFJJ nian.

Artigu 69.º

Funsaun formadór SFJJ nian

Formadór SFJJ nia kompeténsia maka:

- a) Organiza no dezempeña ba atividade formasaun, liuliu, ba hirak-ne'ebé ema tau-fiar ba;
- b) Halo avaliasaun ba formandu jurídiku tuir matéria ne'ebé sira hanorin ba;
- c) Elabora matéria, iha lian-ofisiál rua, hodi fó-apoiu ba estudu no organiza bibliografia ba tema ne'ebé nia responsabiliza ba;
- d) Kolabora ho Diretór no dosente sira iha SFJJ kona-ba atividade formasaun ne'ebé iha ligasaun ho funsaun hirak be temi ona iha número liubá.

Aritgu 70.º

Orietadór sira-nia funsaun iha faze formasaun-prátika no estájiu

1. Iha faze prátika no estájiu, orientadór iha kompeténsia hodi:

- a) Akompaña formandu sira-ne'ebé nia responsabiliza ba, tuir termu instrusaun jerál hodi ezekuta planu estájiu nian;
- b) Fó-apresiasaun no diskute kona-ba traballu ne'ebé formandu sira apresenta no fornese formasaun kona-ba sira-nia aproveitamentu.
- c) Fó-avaliasaun ba formandu sira-ne'ebé nia responsabiliza ba.

2. Renumerasaun ba orientadór estájiu nian, sei selu tuir termu hosi artigu 73.º.

Artigu 71.º

Formasaun ba formadór sira

SFJJ asegura no promove formasaun ba nia dosente no formadór sira tuir duni sira-nia knaar.

Artigu 72.º

Férias

1. Dosente no formadór SFJJ iha direitu hodi hasai férias ne'ebé la maihosi períudu letivu ba kursu formasaun nian.
2. Iha esesaun no, bainhira, la prejudika norma funcionamentu ba atividade formasaun SFJJ nian, Diretór bele fó-autorizasaun ba dosente sira hodi foti férias iha tempu ne'ebé atividade la'o hela.

Artigu 73.º

Rejime remuneratóriu

1. Ministru Justisa hamutuk ho Ministru Finansa mak hatuun despaxu kona-ba rejime remuneratóriu ba dosente no formadór sira, oirentadór iha faze estájiu nian, nomós konkursu hodi tama ba formasaun dahuluk.
2. Despaxu ne'ebé temi iha númeru kotuk ba, mak hatuur valór ba bolsa formasaun fulan nian, ne'ebé sei fó ba formandu jurídiku iha SFJJ.
3. Majistradu, funsionáriu ka ajente hosi Estadu ne'ebé hala'o knaar hela no hetan nomesaun hodi sai dosente ka formadór iha loron-tomak, bele hili atu simu remunerasaun tuir nia kargu ka hosi fatin uluk ne'ebé nia hala'o servisu ba.

SEKSAUN II

Rekrutamentu no seleksaun ba dosente no formadór iha SFJJ

Artigu 74.º

Prosedimentu hodi halo seleksaun ba dosente no formadór iha SFJJ

1. Selesaun ba dosente no formadór iha tempu tomak, sei halo liuhosi konkursu públiku ho objektivu atu halo selesaun ho transparénsia no izentu hosi sira be iha interese atu hala'o kna'ar iha SFJJ no hatudu duni kondisaun-di'ak hodi ezerse funsaun sira-ne'e, tuir méritu profsionál, sientífiku no pedagójiku.
2. Atu verifika méritu profisionál, sei halo selesaun liuhosi avalisaun ba kandidatu sira-nia kuríkulu tuir faze rua:
 - a) Iha faze dahuluk, liuhosi análize ba dokumentu komprovativu tuir rekezitu ne'ebé hatuur ona, hodi prenxe fatin nuudar dosente ka formadór iha SFJJ nomós elementu importante hotu hodi halo ponderasaun ba kuríkulu;
 - b) Iha faze daruak no kandidatu ne'ebé liu ona, juri konkursu nian sei halo entrevista hodi diskute perkursu no atividade kurikulár hosi kandidatu, ho objektivu atu kompleta liután júri nia juízo kona-ba konsisténsia no importánsia hosi kursu ida-ne'e nomós kandidatu nia vokasaun espesiál hodi hala'o funsaun sira nuudar dosente iha SFJJ.
3. Avaliasaun jerál finál ba kandidatu tatuir kedas faze sira be refere iha númeru kotuk, ne'ebé júri mak halo, hodi konsidera mós elementu be hatada iha teór entrevista ne'ebé realiza ona no sei valoriza fatór hirak tuirmai:
 - a) Esperiénsia profisionál ne'ebé kleur ona no konsistente kona-ba domíniu iha funsaun ne'ebé hatada ba formasaun hodi prepara profisionál hosi setór justisa nian;
 - b) Kapasidade hodi hola-parte iha formasaun ho modelu ne'ebé padronizadu no integra-an iha estrutura ierarkizada no unitária hodi kordena programa nomós halo materiál formasaun nian;

- c) Kapasidade iha servisu ho ekipa no kolabora ativa ho dosente no formadór sira seluk tán, iha kuadru atividade oioin formasaun nina, ne'ebé komete ba SFJJ;
- d) Vokasaun, pedagójika hodi verifika kona-ba análise dokumentu kompromisu nian be refere iha alínea h) n.º 1 hosi artigu 77.º, ne'ebé kandidatu apresenta liuliu espozisaun ba metodolojia ne'ebé nia iha nomós hodi halo defeza ba an rasik iha nia entrevista.

Artigu 75.º

Rekizitu jerál ba admisaun

Kandidatu ba kargu dosente ka formadór iha SFJJ la'ós prenxe rekizitu hirak ne'ebé preve iha diploma ida-ne'e de'it, maibé tenke prenxe mós rekizitu jerál ba admisaun:

- a) Goja ho di'ak nia direitu sivíl no polítiku;
- b) La bandu atu hala'ó knaar iha funsaun públika ka funsaun ne'ebé atu dezempeña ba;
- c) Hatudu duni katak saúde fíziku no perfíl mentál di'ak tebes atu hala'ó knaar.

Artigu 76.º

Júri

1. Júri ba prosesu selesaun dosente no formadór iha SFJJ, forma hosi Diretór SFJJ ne'e rasik no hosi:

- a) Juis Konselleiru ida;
- b) Adjuntu Prokuradór-Jerál Repúblika ida;
- c) Adjuntu Defensór Públiku-Jerál ida;

2. Ministru Justisa mak hili juri tuir despaxu ne'ebé autoriza hodi halo abertura ba konkursu.

3. Bainhira de'it bele, kompozisaun ba juri tenke respeita ekilíbriu jéneru nian.

4. Juri bele funsiona, bainhira de'it membru hotu marka-prezensa tanba maioria mak sei fó deliberasaun, nune'e mós Diretór, se haree ba direitu votu ne'ebé dezempata.

Artigu 77.º

Formalizacao ba kandidatura

1. Kandidatu sira tenke formaliza liuhosi rekerimentu, dijital ka suratahan, ne'ebé haruka ba Diretór SFJJ no tau hamutuk mós dokumentu hirak tuirmai:

- a) *Curriculum vitae* kompletu, tau loron no asina;

- b) Halo kópia momoos Billete Identidade ka dokumentu seluk kona-ba identifikasaun ne'ebé validu;
 - c) Halo kópia momoos sertifikadu abilitasaun ne'ebé akompañã ho tradusaun auténtika, bainhira hakerek iha lian-estranjeira;
 - d) Halo kópia momoos sertifikadu kona-ba asaun formasaun profisionál rasik no akompañã ho tradusaun auténtika, bainhira hakerek iha lian-estranjeira;
 - e) Halo kópia momoos sertifikadu kona-ba formadór profisionál, se iha ona;
 - f) Dokumentu ne'ebé komprova esperiênsia profisionál, tenke temi duni tinan, fulan no loron kona-ba tempu servisu ne'e;
 - g) Indika área ka área formasaun profisionál sira nuudar dosente ne'ebé kandidatu konsidera iha abilidade ba;
 - h) Deklarasun ba kompromisu formasaun, hodi temi kona-ba atu kumpre objektivu hosi formasaun profisionál, integra ho limite pájina lima, no fó-sai krítika ba metodolojia nomós estratéjia ensinu-aprendizajen nian, be konsidera adekuaudu ba formasaun profisionál jurídika ne'ebé loke-dalan hodi dezenvolve kualidade no adkiri kompetênsia téknika, profisionál hodi hala'o kna'ar iha funsaun ne'ebé atu ba.
2. La apresenta dokumentu sasá de'it ne'ebé temi iha númeru kotuk ba, ne'e hasai kedas kandidatu.

Artigu 78.º

Klasifikasaun finál

1. Halo ponderasaun jerál hosi fatór oioin ne'ebé hetan iha faze rua prosesu selesaun nian, determina kona-ba atribuisaun kalsifikasaun finál hosi eskala ho valór 0 too 20, ne'ebé júri tenke fundamenta iha ata reuniuan no tatuir kedas hodi halo lista ida ba kandidatu sira-nia graduasaun.
2. Sei publika lista gradusaun iha editál sede SFJJ nomós SFJ nia sítiu internét.
3. Sei tau konsiderasaun ba lista gradusaun finál kona-ba proposta nomesaun ne'ebé Diretór apresenta, ho objektivu atu prenxe vaga ba dosente no formadór, ne'ebé sei la'o iha tinan kontratu nia laran, tuir área be verifica vaga ne'e, nomós área formasaun profisionál ne'ebé kandidatu iha abilidade ona.

SEKSAUN III

Dixiplina no avaliasaun ba dosente no formadór iha SFJJ

Artigu 79.º

Rejime dixiplinár

Sei aplika ba dosente no formadór sira iha SFJJ, ho adaptasaun balun, rejime dixiplinár hosi funsionáriu públiku sira nian.

Artigu 80.º

Avaliasaun

1. Avaliasaun dezempeñu ba dosente no formadór sira iha SFJJ sei haree liu ba kompeténsia téknika, sientífika no pedagójika ne'ebé hatudu durante fó formasaun.
2. Konsellu Pedagójiku no Dixiplinár mak aprova avaliasaun dezempeñu hosi dosente no formadór sira, no, koordinadór formasaun mak elabora relatóriu ida, ne'ebé sei konsidera mós aspektu sira tuirmai:
 - a) Domínio ba matéria;
 - b) Métudu ne'ebé utiliza, liuliu, kona-ba objetivu sira;
 - c) Linguajen ne'ebé uza;
 - d) Asiduidade no pontualidade;
 - e) Empeñu no dsiponibilidade atu fó-apoiu no assisténsia ba formandu sira;
 - f) Relasaun entre formadór no formandu sira.

Artigu 81.º

Formandu nia avalisaun ba formasaun no formadór sira

1. Molok kursu formasaun ramata, sei fahe inkéritu- opiniuan ba formandu sira, ho objektivu atu hatene sira-nia hanoin kona-ba aspetu hotu hosi pedagogia no administrasaun nian, ne'ebé iha relasaun ho formasaun.
2. Inkéritu ne'ebé refere iha númeru kotuk ba, bele abranje mós, hosi aspetu sira seluk, hanesan kona-ba utilidade no tratamentu ba asuntu ne'ebé hanorin, nesidade formasaun nian, materiál didátiku be fahe ne'e adekua ka lae, métudu ne'ebé uza, formadór sira-nia dezempeñu, apoiu admistrativu no apoiu operasionál.
3. Partisipasaun iha avaliasaun ne'ebé temi iha númeru sira liuba no prenximentu inkéritu nian, sei la tau naran.
4. Rezultadu hosi dados inkéritu, tenke tau-hamutuk iha relatóriu final kursu formasaun nian.
5. Formandu sira mak avalia formadór nia dezempeñu, hosi hirak seluk, sei temi tán kona-ba aspetu ne'ebé refere iha n.º 2 artigu kotuk ba, no dados sira-ne'e sei tau-hamutuk iha kordenadór formasaun nia relatóriu.

KAPÍTULU VII

DISPOZISAUN FINÁL

Artigu 82.º

Kontazen prazu

Bainhira dispozisaun seluk seidak iha, kontazen ba prazu ne'ebé refere iha diploma ida-ne'e, sei aplika regra sira tuirmai:

- a) Prazu ne'ebé sei hahú la depende ba formalidade sasá de'it;
- b) Se la inklui iha kontajen loron ne'ebé eventu komesa la'o, hahú kedas hosi prazu;
- c) Prazu ne'ebé fiksa ona, sei suspende iha sábadu, domingu no feriadu sira;
- d) Se prazu final mak koinsidi ho loron ida ne'ebé servisu ne'e rasik labele fó-amententu ba públiku, ka la funsiona iha períudu normál, sei tranfere ba loron-servisu tuirmai;
- e) Sei konsidera hodi la halo servisu ba públiku bainhira iha toleránsia-pontu totál ka parsiál.

Artigu 83.º

Norma revogatória

Revoga:

- a) Dekretu-Lei nº 15/2006, 1 setembru;
- b) Dekretu-Lei nº 18/2016, 22 juñu.

Artigu 84.º

Hahú hala'o knaar ho kbiit legál

Dekretu-Lei ida-ne'e sei hahú vigora iha loron tatuir ninia publikasaun.

Aprova iha Konsellu Ministru iha 20 novembru 2019

Primeiru-Ministru,

Taur Matan Ruak

Ministru Justisa,

Manuel Cárceres da Costa

Promulga iha 5.3.2020

Publika.

Prezidente Repúblika,

Dr. Francisco Guterres Lú Olo